



KEMENTERIAN PERPADUAN NEGARA
JABATAN MUZIUM MALAYSIA

SIARAN MEDIA

PAMERAN NARATIF: MENCIPTA MASA DEPAN MELALUI REKAAN TEKSTIL

KUALA LUMPUR, 15 Februari - Jabatan Muzium Malaysia melalui Muzium Tekstil Negara dengan kerjasama Jabatan Seni Reka Teknologi Tekstil, Universiti Teknologi MARA mengadakan “**Pameran Naratif: Mencipta Masa Depan Melalui Rekaan Tekstil**” bermula **15 Februari 2026 hingga 31 Mei 2026** di **Galeri Saindera, Muzium Tektill Negara**. Pelaksanaan pameran ini merupakan salah satu bidang kerjasama yang termeterai melalui Memorandum Persefahaman (MoU) di antara Jabatan Muzium Malaysia dengan Universiti Teknologi MARA. Pameran ini menghimpunkan hasil kerja 16 orang pelajar dari Program Sarjana Muda Kepujian Seni Reka Teknologi Tekstil, Fakulti Seni Lukis & Seni Reka, Universiti Teknologi MARA (UiTM).

Pameran ini mempamerkan hasil kreatif dan konseptual oleh pelajar dalam meneroka tekstil sebagai karya seni kreatif ekspresif dan produk yang berdaya maju secara komersial. Melalui eksperimen bahan, inovasi permukaan, dan naratif rekaan yang bernas, pelajar mempamerkan tekstil sebagai medium dinamik yang merapatkan tradisi, kemampunan dan amalan kontemporari.

Pameran ini juga mengetengahkan tafsiran semula teknik kreatif tekstil, khususnya batik, tenunan, percetakan konvensional dan digital tekstil. Umpamanya, batik diterokai melangkaui sempadan konvensionalnya melalui motif eksperimen, teknik resis berlapis, dan aplikasi warna kontemporari. Percetakan tekstil dihasilkan secara artistik dan dikomersilkan. Manakala tenunan digunakan untuk mencipta permukaan, tekstur dan bentuk yang inovatif yang mana sesetengahnya menjangkau kepada ekspresi arca dan konsep.

Hasil karya tekstil ini dipamerkan sebagai medium penceritaan yang berkuasa, menangani tema identiti, warisan, alam sekitar dan kemungkinan masa hadapan. Pengunjung akan memerlihat karya yang dibangunkan sebagai karya seni tekstil sendiri bersama reka bentuk yang bertujuan untuk aplikasi fesyen, dalaman dan gaya hidup, mencerminkan orientasi dwi kreatif dan komersial dalam pameran ini.

Bidang kerjasama melalui MoU seumpama ini menyediakan platform kepada pelajar sebagai persediaan pelajar sebelum menuju ke dunia professional. Selaras dengan dasar dan aspirasi KPN melalui agenda Pembinaan Negara Bangsa, usaha seperti ini amat penting dalam memperkukuhkan kefahaman terhadap kepelbagaian budaya yang menjadi teras kekuatan Malaysia.

Muzium Tekstil Negara menjemput orang ramai untuk bersama-sama meraikan visi pereka generasi baharu ini menerusi “**Pameran Naratif: Mencipta Masa Depan Melalui Rekaan Tekstil**” dan menghayati karya seni mereka di **Galeri Saindera, Muzium Tekstil Negara** bermula pada **15 Februari 2026 hingga 31 Mei 2026**. Maklumat lanjut layari laman sesawang www.jmm.gov.my atau ikuti media sosial rasmi Muzium Tekstil Negara.

Jabatan Muzium Malaysia
15 Februari 2026
JMM.100-9/1/7 (29)